

5. maaji 2022

UPA2022/48

Isumaginninnermi ikiorsiissutit tunniunneqartartut atuuttut pillugit kaajallaasitaq nr. 294 ulloq 1. Januaari 2022 aallarnerfigalugu atuutilersumi § 11 allanngorteqqullugu Naalackersuisut peqquneqarnissaannik inatsisartut aalajangiiffigisassaattut siunnersuut, ulloq 1. Januaari 2023 atuutilersumik nalinginnaasumik ilaqutariinnut paarsisartunut paaqqinninersiutit marloriaatinngortittussanngorlugit.

(Siumup Inatsisartunut ilaasortaaitai)

Siumup inatsisartuni ilaasortaaitaasa aalajangiiffigisassatut siunnersuutaanut Siumut ima oqaaseqaateqassaaq:

Meeraq angerlarsimaffiup avataanut inissinneqartillugu siunertaasoq pingaarneq unaavoq, meeraq eqissilluni toqqissisimallunilu inuuneqarnissamut pitsaanerusumik periarfissinneqassasoq, - taamallu tunngaviliiniarluta allatut ajornartumik inuiaqatigiittut iliuuseqartariaqalersimasugut.

Siumumit isumaqarpugut meeraq angerlarsimaffiup avataanut inissinneqassatillugu, angajoqqaarsianngortussat sukkanerpaamik meeqqap toqqissisimalernissaanut iliuuseqarsinnaassuseqassasut. Meeqqap ilaqutariinnut nutaanut, taakkulu ulluinnarni inuunerannut sukkanerpaamik toqqissisimanartumillu akulerutsinneqassasoq pingaaruteqarluinnartutut isigaarput.

Taamaammat Siumumit, angajoqqaarsianngortartut inuiaqatigiinnit ajunngitsumik atugassaarnissaat pingaartutut isigaarput, aamma inuiaqatigiit tamatta tamanna pisussaaffittut isigigipput Siumumit qularutiginnilarput.

Isumaqarpugut angajoqqaarsiat akissaasersorneqarnerat ullutsinnut naleqqukkunnaarsimasoq, siunnersuutigineqartorlu tunngaviusumik tapersorsorparput pisariaqavissutullu isigalutigu.

Maluginiarparput siunnersuummut naalackersuisut akissuteqaatiminni eqqartoraat, angajoqqaarsianngortartut paaqqinninersiutaannik qaffaanissaq maannakkut kommuninut periarfissaareersoq. Naalackersuisut akissuteqaatiminni ilaatigut allapput, immikkut iliuuseqartoqarsinnaanerit eqqarsaatigalugu kommunit namminneq nalilersuinerminnut atatillugu inissitsiterisinnaasut. Taamaattoq ilanngullugu oqaatigineqarpoq, malittarisassat kommuninut paasiuminaassinnaasut. -- Taamaattumillu malittarisassat kommuninut erseqqinnerulersinneqarnissaat sulissutigineqalersoq. Tamanna Siumumit – eqqumiigikujukkaluarlutigu, tassami paasissaanngitsuliorluni malittarisassaliortoqarsimassappat eqqumiimmat – tusaatissatut tiguarput.



Tapersorsorparputtaaq qulaani pineqartut tunngavigalugit, Naalakkersuisut allannguutissamik siunnersuuteqarmata, angajoqqaarsiaasartunut tunngatillugu nalunaarusiamik nutaamik suliaqarniarlutik, nalunaarusiarlu taanna suut periarfissaanerani erseqqissaassutaassasoq.

Tassunga atatillugu Siumut piumasaqassaaq, nalunaarusiap suliarineqarnerani ataatsimiititaliaq susassaartoq malinnaateqqissaarneqassasoq.

Taamak oqaaseqarluta siunnersuut Siumumit tapersorsoratsigu oqaatigissavarput, aappassaaneeraneqannginneranilu ataatsimiititaliamut susassaqartumut sukumiisumik eqqartorluarneqarnissaa siunertaralugu innersuupparput. Pineqartorlu eqqaamaqqarput: Angajoqqaarsiannngortartut atugaasa pitsanngorsarneqarnissaat, tamannalu meeraq salliutillugu pissasoq.

Aslak W. Jensen, siumut